

Jueves Paka-Pentecostes

**AN SATONG KAGURANGNAN JESU CRISTO
PINAKA-HALANGKAW NA PADI SAGKOD PA MAN**
Fiesta

An fiesta kan satong Kagurangnan Jesu Cristo, Pinakahalangkaw na Padi sagkod pa man, susog sa orden ni Melkisedek, na sa dai-masukol na panahon makawiwili sa Ama, (siya) na Tagapag-ultanan kan Dios asin katawohan, sa pag-otob kan kabôtan kan Ama, makasarong nagsacrificio sa altar kan cruz kan saiyang sadiri bilang nakakaligtas na Victima (Atang) para sa bilog na kinaban. Sa siring na pagtugdas kan forma kan daing-tapos na sacrificio, may karahayan nin sarong tugang, nagpili siya sa mga aki ni Adan nin mga lalaki na mapadakul sa pagkapadi sagkod na sinda, gikan sa danay na binagong sacrificio sa Simbahan, magbulos na mga salog nin diosnon na kabagsikan, na huli kaini nahihimo an bagong langit asin bagong daga, asin nalulubos sa kasagkoran kan bilog na kinaban an dai pa nahiling kan mata, ni nadangog kan mga talinga, ni nasabotan kan puso nin tawo.

ANTIFONA SA PAGLAOG

Cf. Heb 7,24; 9, 15

An Cristo, Pag-ultanan kan bâgong tipan
huli ta siya nagdadanay sagkod pa man,
igwa nin daing-sagkod na Pagka-padi.

Pinapamibi an Kamurawayan.

COLECTA

O Dios,
na para sa kamurawayan kan saimong kahalangkawan
asin para sa kaligtasan nin katawohan,
minuknâ mo an saimong bogtong na aki
Orog kahalangkaw na Padi sagkod pa man,
warasan na, sa kadagyaan kan Espiritu Santo
sindang mga pinili niyang mga ministro
asin katiwala kan saiyang mga misterio
makuang maimbod sa pag-otob kan inakong ministerio.
Huli ki Jesu Cristong Kagurangnan niamo, saimong aki,
na kaiba mong nabubuhay asin naghahade,
kasaró kan Espiritu Santo,
Dios, sa gabos na kapanahonan kan mga panahon.

Taon A

ENOT NA BABASAHON

Pagbasa sa Libro nin Genesis

22, 9-18

Pag-abot [ni Abraham asin ni Isaac] sa lugar na isinabi [ki Abraham] kan Dios, nagtugdok duman si Abraham kan altar, hinusay an mga kahoy, ginapos si Isaac na saiyang aki asin ibinugtak sa altar, sa ibabaw kan mga sungo. Iginawgaw ni Abraham an saiyang kamot asin kinua an kutsilyo, tanganing i-sacrificio si Isaac. Alagad inapod siya kan angel kan KAGURANGNAN hale sa langit: “Abraham, Abraham!” Nagsimbag: “Uya ako!” Nagsabi: “Dai mo ipagbingat an saimong kamot laban sa aki; dai mo siya paggibohan nin ano man. Ngonian aram ko na may pagkatakot ka sa Dios, asin dai mo isinayuma sako an saimong aki, an bogtong mong aki.” Pag-itaas kan saiyang mga mata, nakahiling si Abraham: uto, sarong lalaking karnero na an mga sungay nasabit sa palumpong. Kinua niya an karnero asin inatang bilang tinutong-na-atang embes kan saiyang aki. Nginaranan ni Abraham an lugar na idto, “Bahala-an- KAGURANGNAN,” malà ta sagkod ngonian sinasabi: “Sa Bukid Bahala-an- KAGURANGNAN.” Nag-apod giraray ki Abraham an angel kan KAGURANGNAN hale sa langit, asin nagsabi: “Sa sako nagsusumpâ ako olay kan KAGURANGNAN, nin huli ta ginibo mo an bagay na ini asin dai mo ipinangilin an saimong aki, an bogtong mong aki, bebendicionan ta bebendicionan taka, asin papadakulon ta papadakulon ko an saimong tinubo, siring kan mga bitoon sa langit asin kan baybay sa may dagat. Sasakopon kan tinubo mo an puerta kan saindang mga kaiwal, asin mabebendicionan sa saimong tinubo an gabos na nacion sa daga, huli ta dinangog mo an sakong tingog.”

Tataramon kan Kagurangnan.

O:

Pagbasa sa Surat sa mga Hebreo

10, 4-10

Mga tugang: Dai man nakakahale nin kasalan an dugo kan mga toro saka kanding. Kaya, paglaog niya sa kinaban, nagsabi sya: “Sacrificio asin atang dai mo minâwot, alagad hawak inandam mo sako; tinutong-na-atang asin sacrificio para sa kasalan dai mo minarhay. Dangan nagsabi ako: “Uya duminatong ako --- ta sa rolyong libro nasusurat dapit sakuya --- sa paggibo, O Dios, kan saimong boót.” Nagsasabi ngôna: “mga sacrificio asin mga atang, mga tinutong-na-atang saka mga sacrificio para sa kasalan dai mo minâwot, ni minarhay,” mga bagay na idinodolot susog sa Ley. Dangan nagsasabi: “Uya duminatong ako sa paggibo kan saimong boót.” Pinaparà niya an enot, tanganing mapatindog an ikaduwa. Sa bagsik kan ‘boót’ na ini pinabanal kita huli kan pagdolot

kan hawak ni Jesu Cristo makasarô para sagkod lamang.

Tataramon kan Kagurangnan.

SALMO RESPONSORIAL

40, 7-8a. 10-11ab. 17

S. Uya, nagdigdi ako, Kagurangnan, tanganing gibohon an saimong kabôtan.

Sacrificio asin atang dai mo muyá,
kundi an sakong mga talinga binuksan mo.
Tinutong-na-atang asin sacrificio para sa kasâlan dai mo hinagad;
saka man suminabi ako: "Uya, nagdigdi ako." **S.**

Ibinareta ko an kasuripotan, sa dakulang asamblea.
Uyá, an sakong ngimot dai ko pinugolan;
KAGURANGNAN, ika nakaaram.
An saimong kasuripotan dai ko tinahoban sa laog kan sakong puso;
an kaimbodan mo saka pagliligtas sinabi ko. **S.**

Maggaya-gaya asin mag-ogma saimo
an gabos na naghahanap saimo!
Danay sindang magsabi: "Dakula an KAGURANGNAN!"
sinda na namomoot sa saimong pagligtas! **S.**

PAGROKYAW

Fil 2, 8-9

S. Allelúia, allelúia! Nagpakumbaba kan sadiri, nagmakinuyog sagkod sa kagadanan, kagadanan sa cruz. Kaya orog man siyang ilinangkaw kan Dios asin iwinaras saiya an ngaran na labaw sa gabos na ngaran. **S. Allelúia, allelúia!**

EVANGELIO

✠ Pagbasa sa Banal na Evangelio susog ki San Mateo

26, 36-42

Dangan nakaabot si Jesus kaiba ninda sa takulod na inaapod Getsemani, asin nagsabi sa mga disipulos: "Magtukaw kamo digdi sagkod na yaon pa ako duman na nagpapamibi." Iniba niya si Pedro asin an duwang aki ni Zebedeo, asin nagpoon siya mamundo saka mahorasa. Dangan an sabi sinda: "Mamundo an sakong kalag sagkod sa kagadanan; magpawalat kamo digdi asin magpuká kaiba ko." Sa eró-enotan, nagsubasob siya sa pagpamibi asin pagsabi: "Ama ko, kun pwede, lihisan ako kan kalis na ini; alagad bako

susog sa boót ko, kundi susog saimo!” Nagduman siya sa mga disipulos asin naabtan sinda na nagtuturog. An sabi ki Pedro: “Dai palan nindo káya magbantay sarong oras na kaiba ko? Magpuká kamo asin magpamibi, tanganing dai kamo mapasubò sa sugot; an espiritu andam, alagad an laman maluya.” Giraray, ikaduwang bes, naghale siya asin nagpamibi: “Ama ko, kun dai pwede na ini maglihis kundi inomon ko, mangyari an boót mo!”

Marahay na Bareta kan Kagurangnan.

Taon B

ENOT NA BABASAHON

Pagbasa sa Libro ni Profeta Jeremías

31, 31-34

Uya, maabot an mga aldaw, olay kan KAGURANGNAN: makikipagtipan ako sa Israel asin sa harong nin Juda nin tipan na bâgo. Bako siring sa tipan na ginibo ko sa saindang mga magurang kan aldaw na kabiton ko an saindang kamot sa pagpaluwas sainda sa daga nin Egipto, tipan na pinawâran nindang bisa minsan na ngani ako an kagrogaring ninda. Olay kan KAGURANGNAN. Alagad uni an tipan na gigibohon ko sa harong nin Israel pakalihis kan mga aldaw na iyan, olay kan KAGURANGNAN: Ibubugtak ko an sakong Ley sa laog ninda, asin sa saindang puso isusurat: Ako magigi nindang Dios, asin sinda magigi kong banwaan. Dai na sinda magpapa-turutukdoan, na an sabi: Midbida an KAGURANGNAN. Ta sinda gabos makakamidbid sako poon sa pinaka-sadit sagkod sa pinakadakula. Olay kan KAGURANGNAN, huli ta papatawadon ko an saindang mga sala asin an saindang mga kasalan dai ko na gigirumdomon.

Tataramon kan Kagurangnan.

O:

Pagbasa sa Surat sa mga Hebreo

10, 11-18

Mga tugang: An lambang padi nagtitindog sa saiyang katungdan aroaldaw, dayaday na idinodolot an dating mga sacrificio na dai man lamang nakakapara nin mga kasalan. Alagad ini duminolot nin saro sanang sacrificio para sa mga kasalan, asin tuminukaw para sagkod pa man sa too kan Dios; ngonian naghahalat siya, sagkod na an saiyang mga kaiwal magibong tungtongan kan saiyang mga bitis. Ta sa saro sanang atang nadara niya sa kalubosán para sagkod pa man an mga pinapabanal. Nagsasaksi man sato an banal na

Espiritu; ta pakasabi: “Ini an tipan na mumuknaon ko sainda pakalihis kan mga aldaw na iyan, olay nin Kagurangnan: Ibubugtak ko an sakong mga ley sa saindang mga puso, asin sa saindang mga isip isusurat ko. An saindang mga kasâlan asin an saindang kasombikalan dai ko na gigiromdomon.” Kun saen an kapatawadan kaini, mayo na nin pag-atang manungod sa mga kasalan.

Tataramon kan Kagurangnan.

SALMO RESPONSORIAL

109, 1b-e. 2. 3

S. Ika padi sagkod pa man siring ki Melkisedek

Olay kan KAGURANGNAN sa sakong Kagurangnan:
“Tumukaw ka sa too ko,
sagkod na an saimong mga kaiwal
magibo kong tungtongan kan saimong mga bitis.” **S.**

An cetro mong kakusgan
susugoon kan KAGURANGNAN poon sa Zi'on:
maghade ka sa tahaw kan saimong mga kaiwal! **S.**

Saimo an pagka-prinsipe sa aldaw kan saimong kakayahan,
sa kabangrawan na banal,
sa popônan bago kan daliwawa,
siring sa ambon, inaki taka. **S.**

PAGROKYAW

Heb. 5, 8-9

S. Allelúia, allelúia! Bagaman aki, nakanood siya magkuyog sa saiyang mga tinios; nalubos, nagi siyang dahilan nin kaligtasan na daing kasagkoran sa gabos na nagkuyog saiya. **S. Allelúia, allelúia!**

EVANGELIO

✠ Pagbasa kan Banal na Evangelio susog ki San Marcos

14, 22-25

Mantang sinda nagkakakan, nagkua siya nin tinapay asin nagbendicion, binaak asin itinao sainda, asin nagsabi: “Akoa; ini an sakong hawak.” Dangan, kinua niya an kalis asin nagpasalamat, itinao sainda asin nag-irinom duman an gabos. Nagsabi siya sainda: “Ini an sakong dugo kan tipan, na pinapabulos para sa dakul. Amen, nagsasabi ako

saindo: Dai na ako ma-inom sa bunga kan ubas sagkod sa aldaw na iyan, na ini iinomong bago sa kahadean kan Dios.”

Marahay na Bareta kan Kagurangnan.

Taon C

ENOT NA BABASAHON

Pagbasa sa Libro ni Profeta Isaías

6, 1-4. 8

Taon na nagadan si Hadeng Uzías, nahiling ko an Kagurangnan nakatukaw sa trono, halangkaw na initaas, an gayad kan sayang gubing nagpapanô kan templo. Mga serafin nakatindog sa palibot niya, tig-anom na pakpak an lambang saro, duwa itinatahob sa lalawgon, duwa itinatahob sa bitis, duwa ilinalayog. Nag-aarapodan sinda na an sabi: “Banal, banal, banal an KAGURANGNAN nin mga hukbô; panô an bilog na daga kan sayang kamurawayan!” Nayugyog an mga taririkan kan mga pinto sa tingog na nagkukurahaw asin an harong napanô nin asó. Dangan nadangog ko an tingog kan Kagurangnan na nagsasabi: “Siísay an susugoon ko? Siísay an malakaw para samo?” Nagsabi ako: “Uya ako, sugoa ako!”

Tataramon kan Kagurangnan.

O:

Pagbasa sa Surat sa mga Hebreo

2, 10-18

Mga tugang: Angay saiya, na iyo an katuyohan kan gabos asin an dahilan kan gabos, na, sa pagdara kan dakul na aki sa kamurawayan, lubosón an pamayo [poón-lidera] kan saindang kaligtasan sa paagi kan mga pagtíos. Si nagpapabanal asin si mga pinapabanal anas gikan sa saro. Kaya dai niya sinda ikinakasupog apodon na mga tugang, sa pagsabi: “Ipapamareta ko an saimong ngaran sa sakong mga tugang, sa tahaw kan asamblea aawiton ko an saimong kaomawan”; asin saro pa: “Magigi akong tiwalà saiya”; asin saro pa: “Uyá, ako asin an mga aki na itinao sako kan Dios.” Kaya, palibasa an mga aki magka-paropakinaabang sa dugo asin laman, siya man nakihiras dyan siring sainda, tanganing huli kan kagadanan mawâran-kamanungdanan an may kapangyarihan nin kagadanan, na iyo an Diablo, asin maitalingkas an mga unong kan takot sa kagadanan naoripon bilog nindang pagkabuhay. Dai niya бага pinapangakoan an mga angel, alagad pinapangakoan niya an tinubo ni Abraham. Kaya dapat magi siyang siring sa mga tugang sa gabos na bagay, tanganing magi siyang maheherakon asin maimbod na poón

na padi sa atubang kan Dios na makikisuyo para sa nagkasalang banwaan. Huli ta may karanasan nin pagtios, siya na sinugotan makakatabang sa mga sinusugotan.

Tataramon kan Kagurangnan.

SALMO RESPONSORIAL

23, 2-3. 5. 6

S. An Kagurangnan sakong pastor, dai ako magkukulang.

Sa madoot na kapatagan pinapalukó niya ako
Pasiring sa matiwasay na katubigan dinadara,
an sakong kalag pinapaginhawa.
Inaantabayan nya ako sa mga girà nin kasuripotan
alang-alang sa saiyang ngaran. **S.**

Inandam mo sa atubang ko an lamesa,
laban sa sakong mga kalaban;
linalahidan mo nin olor an sakong payo,
an sakong kopa nagsusupay. **S.**

Karahayan sana asin karahayan-boot an maglalamag sako
gabos na aldaw nin sakong pagkabuhay;
mag-eerok ako sa harong kan KAGURANGNAN
sa kalawigan nin mga aldaw. **S.**

PAGROKYAW

Ez 36, 25a. 26a

S. Allelúia, allelúia. Wiwirikan ko kamo nin malinig na tubig; tatawan ko kamo nin bagong puso: bagong espiritu ilalaog ko saindo. **S. Allelúia, allelúia.**

EVANGELIO

✠ Pagbasa kan Banal na Evangelio susog ki San Juan

17, 1-2. 9. 14-26

Ini tinaram ni Jesus; asin, initaas an saiyang mga mata sa langit, nagsabi: “Ama, uminabot na an oras: pamurawaya an saimong Aki, tanganing an Aki magpamuraway saimo. Susog sa itinao mo saiyang autoridad sa gabos na laman, an gabos na itinao mo saiya matâwan niya nin buhay na daing kasagkoran. Ako nakikiolay dapit sainda: bako an kinaban an ipinapaki-olay ko, kundi an itinao mo sako, huli ta saimo sinda. An gabos na sakuya saimo, asin an saimo sakuya; asin pinagi akong mamuraway sa sainda. Itinao ko

sainda an saimong tataramon, asin na-ongis sainda an kinaban, huli ta bako sinda gikan sa kinaban, siring sako na bako gikan sa kinaban. Dai ko ipinapaki-olay na haleon mo sinda sa kinaban, kundi na atamanon mo sinda laban sa Maraot. Bako sinda gikan sa kinaban, siring sako na bako gikan sa kinaban. Pabanalon mo sinda sa katotoohan. An tataramon mo katotoohan. Siring sako na sinugo mo sa kinaban, sinusugo ko man sinda sa kinaban. Alang-alang sainda, pinapabanal ko an sadiri, tanganing magi sindang banal sa katotoohan. Bako sinda sana an ipinapaki-olay ko, kundi man an mga matubod sako huli kan saindang tataramon: na an gabos magin saro. Siring na ika, Ama, yaon sako asin ako yaon saimo, magi man sindang saro sa satuya, tanganing an kinaban magtubod na ika sako an nag- sugo. An kamurawayan na itinao mo sako, itinao ko man sainda, tanganing sinda magin saro siring satuya na saro: ako sa sainda asin ika sa sako, lubos na mabilog sinda bilang saro, tanganing makaaram an kinaban na ika sako an nagsugo asin namomotan mo sinda siring na namomotan mo ako. Ama, boot ko na an itinao mo sako, kun saen ako, sinda man makaibanan ko, tanganing matànw ninda an sakuyang kamurawayan, na itinao mo sako, huli ta namotan mo na ako bago pa tugdason an kinaban. Suripot na Ama, an kinaban dai saimo nakakamidbid, alagad ako midbid taka asin sinda nakaaram na ika sako an nagsugo. Ipinamidbid ko sainda an saimong ngaran, asin ipapamidbid, tanganing an pagkamoot mo sako mapasainda, asin ako man mapasainda.”

Marahay na Bareta kan Kagurangnan.

PAMIBI NIN BANWAAN

Si Cristo, an Halangkaw na Padi sagkod pa man, nagdolot kan sadiri bilang sacrificio para satong kaligtasan. Sa ngaran niya na satong Tagapag-ultanan, idolot niato sa Ama an satong mga pamibi asin pakimaherak.

Kagurangnan, Hinanyoga an Samong Pamibi.

1. Tanganing an Simbahan, an Banal na Esposa ni Cristo, lubos na malinigan kan dugo na pinabulos kan satong Paratubos sa saiyang sacrificio sa cruz: ipamibi niato sa Kagurangnan.
2. Tanganing huli kan Dugo na pinabulos ni Cristo sa saiyang matagom na cruz, an bilog na kinaban masagom kan katoninongan na dará kan pagligtas satô sa kaoripnan nin kagadanan: ipamibi niato sa Kagurangnan.
3. Tanganing an gabos na nag-ako kan banal na orden nin pagkapadi makabaing sa Halangkaw na Padi asin magdanay na mga banal asin mahigos na katuwang niya sa malodok na pagcelebrar kan mga sacramento: ipamibi niato sa Kagurangnan.

4. Tanganing sa bagsik kan sacrificio na dolot ni Cristo, an Halangkaw na Padi sagkod pa man, an gabos na nakakamate nin pagsakit huli sa helang nin hawak asin isip mag-ako nin kusog asin pagkamatinius sa pakisumaro sa saiyang Pasion: ipamibi niato sa Kagurangnan.
5. Tanganing an gabos na mga gadan na nakisumaro sa Pasion kan Halangkaw na Padi magkanigong mag-ako kan mga biyaya nin saiyang Pagkabuhay-liwat: ipamibi niato sa Kagurangnan.

Magdanay ka, O Kagurangnan Dios, sa saimong banwaan na nakikimaherak tanganing makamtan niamo an saimong danay na tabang sa bagsik kan daing sagkod na sacrificio ni Cristo, an Halangakaw na Padi sagkod pa man, na kaiba mong nabubuhay asin naghahade sa kapanahonan kan mga panahon.

PAMIBI SA MGA DOLOT

Kagurangnan, ining mga atang,
gibohon ni Jesu Cristo, samong Tagapag-ultanan,
na magin kaako-ako saimo,
asin kami, kasaro kaini,
idolot niyang mga makawiwiling sacrificio saimo.
Siya na kaiba mong nabubuhay asin naghahade
sa kapanahonan kan mga panahon.

PREFACIO: AN PAGKA-PADI NI CRISTO ASIN KAN SIMBAHAN

- P. An Kagurangnan mapa-saindo.
B. Asin sa saimong espiritu.
P. Ítaas an mga puso.
B. Initaas mi na sa Kagurangnan.
P. Magpasalamat kita sa Kagurangnan satuyang Diós.
B. Maninigo asin dapat.

Totoong maninigo asin dapat, matanos asin nakakaligtas,
na danay asin minsan saen magpasalamat kami saimo:
Kagurangnan, banal na Amâ,
Diós na makakamhan na daing kasagkoran:

Ta sa paglahid kan Espiritu Santo minukna mo an Bogtong mong Aki,
Halangkaw na Padi kan bâgo asin daing sagkod na tipan,
asin sa dai-masabing kabôtan pinagkanigo mong pabanalón,
tanganing an saiyang napapalaen na pagkapadi
maglingkod sa Simbahan.

Ta siya man naggad bako lang na nagsamno
nin sa-hadeng pagkapadi sa banwaan na sinadiri,
kundi sa karahayan nin magturugang
nagpili nin mga lalaki,
tanganing magin mga kasumaro
sa saiyang banal na ministerio
sa [paagi nin] pagpatong nin mga kamot.

Sindang nag-aandam kan bangkete pascual
para sa saimong mga aki,
magbâgo, sa saimong ngaran,
kan sacrificio nin pagtubos sa katawohan,
asin sa pagkamoot mangenot sa saimong banal na banwaan,
magpakakan [sainda] sa tataramon,
magpakusog [sainda] huli kan mga sacramento.

Sindang nagdudusay kan buhay alang-alang saimo
asin para sa kaligtasan nin mga tugang,
maghingowa na magin oyon sa ladawan ni Cristo man sana,
asin padagos na magsaksi saimo sa pagtubod asin pagkamoot.

Kaya kami man, Kagurangnan,
kaiba an mga Angeles asin gabos na Santos,
nagpapahayag saimo, sa kaogmahan nagsasabi:

Banal, banal, banal an Kagurangnan Diós nin mga Hukbô.
An langit asin dagâ pano kan saimong kamurawayan.
Hosánna sa kaitaasan.
Paladan an minadigdi sa ngaran kan Kagurangnan.
Hosánna sa kaitaasan.

ANTIFONA SA COMUNION

Mt 28,20

Uya, ako yaon saindo sa gabos na aldaw,
sagkod sa katapusan kan panahon.

PAMIBI PAKA-COMUNION

Kagurangnan, namimibi kami,
an banal na hostia na samong idinolot asin pinakinabanangan,
magwaras nin buhay samo,
tanganing, kasarô saimo sa danay na pagkamoot,
magwaras kami nin bunga na padagos na magdadanay.
Huli ki Cristo samong Kagurangnan.